

Ansprache anlässlich der Tango-Taufe vom 12. November 2011 auf dem Schlossplatz

Myni Dame und Heere,

Härzlig willkomme do z'Binnige uff em Schlossplatz zur Drämmli-Taufi: hütt wird e neus Tango-Tram uff dr Namme „Binnige“ tauft. Härzlig willkomme in däre bsundere, futuristische „BLT Tango Town Binningen“. Bsunders freu i mi au ab däm schöne Herbstwätter: i glaub dr Petrus isch is fründlig gsinnt, wie au sällmool am 15. Auggschte 2009 bim Trämmli-Fest am Kroneplatz! Är isch sicher au e Fründ vom ÖV wie-n-ych.

Jä: i bi ne Fründ vom ÖV und vo dr Verkehrsberuhig in de Wohnquartier. Maischtens fahri Velo und ab und zue bini auf sehr froh um dr ÖV.

Si wüsse: Binnige isch mit em ÖV sehr guet erschlosse, au dangg dr Stadtnöchi. Das treit au wäsentlig zue unsere Standortattraktivität by! Anderersyts hämmer bsunders am Morge und Zobe e grosse Pändlerverkehr uff unsere Strosse. Binnige isch dr Aafang oder au dr Schluss vom Leimetal, wie me s nimmt.

Mit däne neue Tango-Tram, wo denn ab em Fahrplanwäggsel im 7 ½-min Taggt (vorhär 10min) verkehre, spöter denn au mit de Projäggt Margarethestich (diräggti Verbindig Leimetal-Bahnhof) und mit de neue Doppelspure bim Spiesshöfli und au im hintere Leimetal wird d' Attraktiviät vom ÖV nommol wäsentlig verbessert und do drmit hoffe mr auf uf e nommol bessere Umstyggeffäggt vom motorisierte uff e ÖV. In däm Zämmehang hoff i, und i wird mi drfür Ysetze, dass trotz em aktuelle Sparprogramm im Baselbiet, die vorhär gnennte, wichtige ÖV-Projäggt zügig umgesetzt wäre. Das sinn Investitione in d' Zuekunft!

E Praliné für dr Andreas Büttiker: e wytere, gleine Bytrag leichtet au Binninge an d' Förderig vom ÖV: mr hänn im Budget 2012 vorgseh unsere Gmeindagstellte `s Job Ticket z'offeriere (vergünstigts U-Abo): hoffetlig bewilliget das unsere Ywohnerrot in dr Dezämber-Budgetsitzig!

Die neue Tango-Tram wärde `s Erschynigsbild vo dr Gmeind mitpräge. Die Tram wärde in de kommende Johrzähnte in Binnige in- und usfahre.

Jetzt wotti no uff s Rahmeprogramm hiwyse: d' Metallharmonie Binnige hänn Si scho ghört, denn noch em Taufaggt kömme e Tangouffiehrig vo dr Tanzbar Binnige und denn no d' Jazz-Combo vo dr Musikschuel Binnige-Bottmige. Däne allne härzlige Dangg. Speziell dangg i au em Sportclub Binnige, dr Verwaltig (Wärgghof und Bauabt), de Samariter, und bsundere Dangg an d BLT und an d Event-Agentur „Crome-Communications“, wo dä schöni Obe do z' Binnige organisiert hänn und jetzt durefiehre!

Wenige Worte bei Taufakt

Mir sinn stolz, dass e Tango-Tram dr Binniger Namme und s Wappe ins BLT-Netz treit

Mir sinn danggbar, dass Binnige mit däne Tango Tram im regionale ÖV-Netz verträte isch

I wünsch däm Binniger Tram und all syne Gspänli e johrzähntlangi, gieti, zueverlässigi und sicheri Fahrt in dr Basler Region.

Unter em Motto: „Drämmli .. Drämmli uff di freu mi nämmlig“ wirsch du jetz uff dr Namme Binnige tauft!